

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՊԵՏԱԿԱՆ ԵԿԱՄՈՒՏՆԵՐԻ ԿՈՄԻՏԵ
ՀԱՐԿԱՅԻՆ ԵՎ ՄԱՔՍԱՅԻՆ ՄԱՐՄԻՆՆԵՐԻ ԲՈՂՈՔԱՐԿՄԱՆ
ՀԱՆՁՆԱԺՈՂՈՎ**

ՈՐՈՇՈՒՄ N 15/80

ք.Երևան

07 մարտի 2024թ.

Հայաստանի Հանրապետության պետական եկամուտների կոմիտեի հարկային և մաքսային մարմինների բողոքարկման հանձնաժողովը (այսուհետ նաև՝ Հանձնաժողով), քննության առնելով «ՀՀ փորձագիտական կենտրոն» ՊՈԱԿ-ի 10.04.2023թ. եզրակացությունն անվավեր ճանաչելու և մեքենայի գինը վերանայելու վերաբերյալ ֆիզիկական անձ Սերգեյ Էյլազյանի դիմում-բողոքը՝

ՊԱՐԶԵՑ

Ֆիզիկական անձ Սերգեյ Էյլազյանը ներկայացված դիմում-բողոքում հայտնել է, որ «ՀՀ փորձագիտական կենտրոն» ՊՈԱԿ-ի 10.04.2023թ.-ի եզրակացությամբ «MAN» մակնիշի, «SA177M0» համարանիշի ավտոմեքենայի միջին շուկայական արժեքը 2022թ. մարտի 23-ի դրությամբ կազմել է 20.000.000 դրամ: Փորձագետը նշել է օգտագործված կայքեր՝ list.am, auto.am, vuva.am և այլն, սակայն չի նշել որևէ փաստական հիմք: Գտնում է, որ «ՀՀ փորձագիտական կենտրոն» ՊՈԱԿ-ի 10.04.2023թ.-ի եզրակացությունն ընդունվել է առանց իրավական հիմքի և դրանք հակասում են ՀՀ օրենսդրության պահանջներին, ուստի խնդրում է անվավեր ճանաչել «ՀՀ փորձագիտական կենտրոն» ՊՈԱԿ-ի 10.04.2023թ.-ի եզրակացությունը և որպես հետևանք վերանայել մեքենայի գինը:

«Մաքսային ծառայության մասին» Հայաստանի Հանրապետության օրենքի 37-րդ հոդվածի համաձայն՝ մաքսային մարմնի ընդունած և ուժի մեջ մտած անհատական իրավական ակտը կարող է բողոքարկվել այն ուժի մեջ մտնելու օրվանից, իսկ մաքսային ծառայողի գործողությունները կամ անգործությունը՝ այն կատարելու կամ ցուցաբերելու օրվանից երկու ամսվա ընթացքում:

Մաքսային մարմնի բողոքարկման հանձնաժողովն ընդունում է դիմում-բողոքի քննարկման վարույթը կարճելու մասին համապատասխան գրավոր որոշում, եթե դիմում-բողոքում նշված պահանջը դուրս է մաքսային մարմնի բողոքարկման հանձնաժողովի իրավասություններից:

Տվյալ դեպքում «ՀՀ փորձագիտական կենտրոն» ՊՈԱԿ-ի 10.04.2023թ.-ի եզրակացությունն անվավեր ճանաչելը դուրս է Հանձնաժողովի իրավասություններից, ուստի և որպես հետևանք, դրա հիման վրա մեքենայի գինը վերանայելը:

Հետևապես, ղեկավարվելով վերը նշված իրավանորմերի դրույթներով՝ դիմում-բողոքի հիման վրա հարուցված վարչական վարույթը ենթակա է կարճման:

Ելնելով քննարկման արդյունքներից և ղեկավարվելով Հայաստանի Հանրապետության հարկային օրենսգրքի 20-րդ բաժնով, «Մաքսային ծառայության մասին» Հայաստանի Հանրապետության օրենքի 37-րդ հոդվածով, Հանձնաժողովը

ՈՐՈՇՈՒՄ Է՝

«ՀՀ փորձագիտական կենտրոն» ՊՈԱԿ-ի 10.04.2023թ. եզրակացությունն անվավեր ճանաչելու և մեքենայի գինը վերանայելու վերաբերյալ ֆիզիկական անձ Սերգեյ Էլյազյանի դիմում-բողոքի քննարկման վարույթը կարճել:

Սույն որոշումն ուժի մեջ է մտնում իրազեկելուն հաջորդող օրվանից:

Սույն որոշմանը չհամաձայնվելու դեպքում այն ուժի մեջ մտնելու օրվանից երկու ամսվա ընթացքում կարող է բողոքարկվել դատարան:

ՀԱՆՁՆԱԺՈՂՈՎԻ ՆԱԽԱԳԱՀ



ԿԱՐԵՆ ԹԱՄԱԶՅԱՆ